
■ PARAULAS AFRICANAS

La funtauna

Ina gronda setgira era vegnida sur il pajais. L'emprim era l'erva vegnida brina e grischa. Lura eran mortas chaglias e plantas pli pitschnas. Nagina plievgia n'è crudada e la damaun è sa svegliada senza il rinfrestg dal ruschè. Ina gronda quantitat d'animals è morta da la said perquai che be paucs avevan gì anc la forza da fugir da quest desert.

La setgira ha cuntinuà. Er ils bostgs ils pli fermes e pli vegls cun ragischs profundas en il terren han pers lur feglia. Tut las cisternas e funtaunas e tut ils flums ed auals eran vegnids setgs.

In'única flur era restada en vita perquai ch'ina fitg pitschna funtauna la deva anc in pèr guts d'aua. Ma la funtauna vuleva desperar: «Tut è daventà setg e mora da la said. Vi da quai na poss jau bain midar nagut. Tge senn ha quai che jau prend anc quests pèr guts or da la terra ed als lascha crudar sin il terren?»

In vegl bostg robust steva en sia vischinanza. Quel aveva udì il plant ed ha anc ditg a la funtauna avant che murir: «Nagina na spetga da tai d'inverdir il desert entir. Tes duair è da dar vita ad ina flur. Quai è tut!»